


MINGGU PRAPASKA KE-2,
13 MAC 2022

Apa Lagi yang Tinggal?



Pesanan *Laudato Si'*

Kita tidak melarikan diri dari dunia dan tidak menyangkal alam, ketika kita ingin bertemu dengan Allah. Hal ini dapat dilihat terutama dalam spiritualiti Kristian Timur: "Keindahan, yang merupakan salah satu nama teristimewa di wilayah Timur untuk mengungkapkan harmoni Ilahi dan model kemanusiaan yang telah berubah rupa, menyatakan diri di mana-mana; dalam bentuk gereja, dalam bunyi suara, dalam warna-warna, dalam cahaya, dalam aroma."

Laudato Si' #235

Luangkan masa untuk mempertimbangkan bagaimana kita memahami keindahan dalam konteks kehidupan setiap hari ini. Bolehkah kita menganggap hubungan yang harmoni dengan Tuhan sebagai sesuatu yang indah? Bolehkah kita juga menganggap bahawa jika kita gagal melihat keindahan di dunia, ia adalah kerana kita tidak memupuk diri untuk mengenali dan mengakui keindahan dalam dan sekeliling kita. Jika keburukan di sekeliling kita berakar dari dosa, begitu juga, adakah keindahan di sekeliling kita boleh disumbangkan sebahagian daripada keindahan daripada dalam diri kita?

INJIL – LUKAS 9:28-36

Yesus Dipermuliakan dihadapan mereka

Kira-kira seminggu setelah Yesus mengatakan perkara-perkara itu, Dia membawa Petrus, Yohanes, dan Yakobus ke sebuah bukit untuk berdoa. Sedang Yesus berdoa, wajah-Nya berubah dan pakaian-Nya menjadi putih berkilauan. Tiba-tiba dua orang bercakap dengan Dia; mereka Musa dan Elia. Mereka kelihatan

bersinar-sinar dengan cahaya dari surga. Mereka berkata-kata dengan Yesus tentang bagaimana Yesus akan segera memenuhi rancangan Allah dengan kematian-Nya di Yerusalem. Pada waktu itu Petrus dan kawan-kawannya tidur nyenyak. Tetapi mereka terjaga dan nampak kemuliaan Yesus serta dua orang yang berdiri dengan-Nya. Ketika dua orang itu hendak meninggalkan Yesus, Petrus berkata kepada-Nya, "Guru, sungguh baik kami di sini. Kami akan mendirikan tiga buah khemah: satu untuk Guru, satu untuk Musa, dan satu lagi untuk Elia." (Sebenarnya Petrus tidak mengetahui apa yang dikatakannya.)

Sementara Petrus berkata demikian, awan datang lalu meliputi mereka, sehingga mereka takut. Dari awan itu terdengar suara berkata, "Inilah Anak-Ku yang telah Aku pilih. Dengarkan kata-kata-Nya!" Apabila suara itu berhenti berkata-kata, mereka melihat Yesus seorang diri di situ. Pengikut-pengikut-Nya tidak berkata apa-apa tentang semuanya itu. Pada waktu itu mereka tidak memberitahu sesiapa pun apa yang telah dilihat oleh mereka.

RENUNGAN

Musa mewakili hukum yang umat Allah telah terima sebelum zaman Yesus. Elia mewakili para nabi, jurucakap Allah yang datang untuk mengingatkan umat tentang hukum. Yesus melampaui keduanya sebagai Allah yang menjelma. Satu pemahaman yang kita boleh beri tentang penjelmaan (inkarnasi), Sabda menjadi daging, ialah bahawa Allah memasuki dan menjadi sebahagian daripada ciptaan. Melalui penjelmaan-Nya, Yesus menjadi seperti kita untuk menunjukkan kita apa yang kita boleh jadi. Penampakan kemuliaan Yesus merupakan sepintas lalu nasib kita.

Petrus dan Yohanes mahu tinggal di gunung itu, tetapi mereka tidak boleh. Akhirnya, semuanya lenyap, dan mereka perlu

meneruskan usaha mereka. Mengikuti tradisi, Petrus mati sebagai martir, tetapi Yohanes menjalani keseluruhan hidupnya secara semulajadi. Begitu juga, kita hanya mampu meneruskan kehidupan kita dengan iman. Yesus menginspirasi imajinasi kita bahawa kita sekarang boleh membayangkan kehidupan kita sebagai suatu ziarah sehingga kita menjadi apa yang Allah mahukan kita menjadi sepenuhnya. Bak kata pepatah, siapa kita adalah pemberian Allah kepada orang lain; siapa yang kita jadi ialah pemberian kita kepada Allah.

Yesaya 40:8 memberitahu kita, "Rumput menjadi kering dan bunga pun layu, tetapi firman Allah kekal selama-lamanya." Dalam penampakan kemuliaan, apabila semuanya lenyap, Yesus masih ada. Ini juga benar dalam kehidupan kita sebagai orang Kristian. Kita percaya bahawa akhirnya, apabila semua benda lenyap, hanya Yesus yang tinggal. Persoalannya ialah, apa akan jadi dengan kita apabila kehidupan kita di sini lenyap, dan kita berdiri di hadirat Yesus? Apa yang kita ada untuk ditunjukkan?

LATIHAN PRAPASKA

Laudato Si' menceritakan tentang harmoni dan persekutuan dengan ciptaan. Paus menulis, "Jika faktanya menjadi manusia menggerakkan orang untuk menjaga alam sekitar di mana mereka adalah sebahagian daripadanya, umat Kristian pun "sedar bahawa tanggungjawab mereka dalam ciptaan, dan tugas terhadap alam dan Sang Pencipta, adalah bahagian penting dalam iman mereka" (LS #64). Untuk renungan kita, kita boleh bertanya pada diri kita, adakah kita tergerak untuk menjalankan peranan kita untuk menjaga alam sekitar?

PENDIRIAN SAYA

- Berjaga-jaga agar tidak menjadi pembazir dan pemboros. Sebagai contoh, berjaga-jaga terhadap penggunaan air dan tenaga elektrik secara berlebihan. Air daripada pembasuhan beras dan sayur boleh digunakan semula untuk menyiram tanaman kita. Kerap menutup penghawa dingin dan kipas apabila kita keluar dari rumah atau bilik. Berkongsi kereta bilamana boleh.
- Kadang-kala, memasang kipas siling, walaupun ia tidak sesuai dengan reka bentuk dalaman rumah anda, menyejukkan bilik anda sehingga anda tidak perlu membuka penghawa dingin.

Tindakan untuk mereka yang pertama kali melakukan:

- Cubalah berkongsi kereta sekali, menyiram tanaman menggunakan air terpakai, atau menutup penghawa dingin apabila kita keluar dari bilik. Menahan diri terhadap godaan untuk membiarkan penghawa dingin terbuka supaya kita dapat kembali ke dalam bilik atau rumah yang sejuk.
- Cuba mulai mengitar semula. Carilah di peringkat persendirian di manakah anda boleh mengitar semula tin-tin aluminium dan plastik anda? Sesetengah pusat membeli-belah mempunyai bekas-bekas di mana anda boleh membuang bateri-bateri terpakai dengan selamat.



**KEUSKUPAN
MELAKA
JOHOR**

www.mjdiocese.my
🌐📱 mjdiocese
📍📱 malaccajohorediocese
caritasmjd.mjdiocese.my
creationjustice.mjdiocese.my



MJD
50
2022

www.lenten.mjdiocese.my
🌐 MJD Lenten